

清代筆記叢刊

履園叢話

錢

泳著

三

四庫全書

卷一百一十五

三

履園叢話卷六

耆舊

清 勾吳錢泳梅溪輯

安安先生

先生姓金氏諱祖靜字會川一號定濤吳縣人雍正七年己酉以國子生薦舉引見授戶部雲南司主事除廣西司員外遷雲南司郎中從大學士忠勇公傅經略金川佐理軍務奏凱知四川敘州府事以親老改近省補山東濟南府知府擢濟東泰武道調運河兵備道又調浙江金衢嚴道陞貴州按察使年七十五致仕歸所居授經堂在金閭門內之皋橋里築安安室以自居盧簾槩几瓦枕藤牀宴如也先生好讀書老而彌篤案頭嘗置五色筆見載籍中有人地事蹟年月先後可疑者必釐而點乙之時作蠅頭小楷撮記大要以便繙閱書法自幼模虞永興繼從外舅楊大瓢先生遊專攻晉帖四十後由二王稍降趙集賢而尤近文待詔羣從子弟以時相見問字必博徵古今緣起根末終日無倦平居多禮而好儉常語人曰惟儉可以惜福惟儉可以養廉起居飲食澹泊寡營溽暑祁寒不爐不扇每日早起晚罷向夜硯火熒熒為苦志明經所不逮也所著有定濤詩文集十二卷趙秋谷沈歸愚兩先生



為之序。藏於家。年八十一卒。泳年十七。曾受業於先生之門。與吳中賢士大夫游。自此始也。

### 隨園先生

錢塘袁簡齋先生。名枚。字子才。少聰穎。年十二。能為文。嘗作高帝郭巨二論。莫不異之。乾隆元年。先生遊廣西。省其叔父於巡撫金公幕。金公奇其狀貌。命為詩。下筆千言。遂大為賞歎。適是年有詔旨舉博學鴻詞科。金公專摺奏聞云。有袁枚者。年未弱冠。經史通明。足應是選。乃送入京師。當是時。海內老師宿儒賢達之士。計九十有八人。而先生最少。天下駭然。無不想望其丰采也。居無何。報罷旋中。戊午科順天鄉試。其明年成進士。入翰林。散館。以知縣用。分發江南。年二十五耳。越十年。乃致仕。築隨園于石頭城下。擁書萬卷。種竹澆花。享清福者四十餘年。著作如山。名聞四裔。年八十二而卒。學者稱隨園先生云。

### 抱經學士

盧抱經先生。名文弼。餘姚人。乾隆壬申。恩科進士。以第三人及第。官至翰林學士。邃于經學。所著有儀禮新校。羣經拾補。鍾山劄記諸書。平生最喜校正古籍。為鍾山

書院山長其所得館穀大半皆以刻書如春秋繁露賈子新書白虎通方言西京雜記釋名顏氏家訓獨斷經典釋文孟子音義封氏見聞錄三水小牘荀子韓詩外傳之類學者皆稱善本。

### 覃溪閣學

大興翁覃溪先生名方綱字正三乾隆壬申恩科進士歷官至內閣學士降鴻臚少卿先生之學無所不通而尤邃於金石文字著有兩漢金石記粵東金石攷諸書所居京師前門外保安寺街圖書文籍插架琳琅登其堂者如入萬花谷中令人心搖目眩而無暇譚論者也嘗得宋板施注蘇詩海內無第二本每至十二月十九日必為文忠作生日會即請會中人各為題名以及詩文歌詠盡海內賢豪垂三十年如一日也嘉慶十六年重赴鹿鳴其明年又重赴瓊林卒年八十六世之言金石者必推先生為歐趙焉。

### 山舟侍講

錢塘梁山舟先生名同書字叔穎乾隆壬申恩科進士官翰林侍講引疾歸以重宴鹿鳴加四品銜家居六十年博學多文而尤工於書日得數十紙求者接踵至於



日本琉球朝鮮諸國皆欲得其片鱗以為快。余少時遊幕杭州。嘗修士相見禮。認先生於竹竿巷里第。必縱譚古今書法源流。以啟迪後生。有董思翁老年風度。年九十餘。尚為人書碑文墓志。終日無倦容。蓋先生以書法見道者也。

### 響泉觀察

吾邑顧響泉先生。名光旭。乾隆壬申恩科進士。以監察御史出為寧夏府知府。旋調平涼府知府。擢鞏秦道。俱有惠政。總督文公綬知其賢。奏請署四川按察使。以失出罷官。歸田後。為東林書院山長。善誘恂恂。培養後進。能詩工書。著有響泉詩鈔十二卷。求書必索潤筆。亦甚廉。即取以市大布。製棉衣。以施寒者。凡邑中同仁堂施藥。施粥。施棺諸善事。先生必力為調度。以得宜而後已。鄉里稱善人焉。

### 西莊光祿

王西莊先生。名鳴盛。字鳳喈。嘉定人。乾隆甲戌進士第二人。以內閣學士降光祿卿。尋丁艱歸。遂不出。遷居蘇州閶門外之聞德橋。余年十六七時。始識于金安安先生坐上。先生勤于著述。嘗與元和惠棟。吳江沈彤。研精經學。有尚書後案。周禮軍賦說。十七史商榷。蛾術編諸書。選生平交遊之能詩者十二家。為苔岑集。自刻所為詩文。

曰西莊始存臺年六十餘雙瞽越十年雙目又明嘉慶二年卒於吳門世之言學者以先生為圭臬云

### 竹汀宮詹

家竹汀先生名大昕字曉微嘉定人乾隆甲戌進士官至詹事府少詹自廣東學政銜卹歸里掌教蘇州紫陽書院者十餘年其學無所不通所著有廿二史攷異金石文跋尾十駕齋養新錄潛研堂詩文全集三統歷述諸書精深純粹貫綜百家是合惠戴兩家之學而集為大成者也余嘗謁先生于書院中聽其言論娓娓不倦大江南北學者莫不推尊先生為第一人其弟可廬先生名大昭為太學生嘉慶元年舉孝廉方正著有廣雅疏義詩古訓兩漢書辨疑後漢書補表說文統釋諸書

### 蘭泉司寇

青浦王蘭泉先生名昶字琴德與王西莊吳竹嶼錢竹汀趙樸菴曹習菴黃芳亭為吳中七子中乾隆甲戌進士官至刑部侍郎自保值內廷參與戎幕以至秉臬開藩躋秩卿貳邊歷中外者三十餘年並著懋績與千叟宴予告歸田年八十三而卒先生嘗東至興京西南至滇蜀所至訪求金石延覽人材從征緬甸有功



賞戴花翎。而謙恭下士。著作等身。聞人有一才一藝。即錄其姓名籍貫。細書小摺。盛以錦囊。各分門類。每與人坐談。一聞佳士。輒從錦囊中取出補之。自古憐才愛士之誠。未有如先生者也。著有述菴文鈔二十卷。金石萃編一百六十卷。又類集所知識之詩與文。為湖海詩傳。湖海文傳若干卷。

### 二林居士

吳門彭尺木先生。名紹升。自號二林居士。前兵部尚書啟豐第四子。乾隆丁丑科。與其兄紹觀同中進士。未殿試。迨尚書公歿後。遂閉關城東文星閣。精心禪理。闡揚淨業。不復與人閒事。著書甚多。如居士傳。善女人傳。諸作大半皆釋氏勸世。普濟眾生之言。古文宗法歸震川。有二林居集二十四卷。內有國朝名臣小傳二十篇。曾以上諸史館。余嘗謁先生於文星閣。必從門外擊磬三聲。而後延入。揮麈譚文。終日不倦。嘉慶元年七月。忽作辭世偈。一病而死。

### 秋帆尚書

鎮洋畢秋帆先生。負海內重望。文章政績。自具國史。乾隆五十二年。先生為河南巡撫。六月廿四日夜。湖北荊州府江水暴漲。隄潰城決。淹沒田廬。人民死者以數十



萬計。七月朔日。得襄陽飛信。先生即於是日。先發藩庫銀四十萬兩。星夜解楚。賑濟一面奏聞。高宗皇帝大加獎賞。以為有督撫才。不數日。即擢授兩湖總督。兼

理巡撫事務。冰時在幕中。親見其事。先生為人。仁而厚。博而雅。見人有一善。必咨嗟稱道之。不置。好施與。重然諾。篤於朋友。如蔣華。馮程。魚門。曹習。菴諸公。身後事。皆為料理得宜。雖千金不顧也。家蓄梨園一部。公餘之暇。便令演唱。余少負慳直。一日同坐觀劇。謂先生曰。公得毋奢乎。先生笑曰。吾嘗題文文山遺像有云。自有文章留正氣。何曾聲妓累忠忱。所謂大德不踰閑。小德出入可也。余始服其言。時和公相聲威赫奕。欲令天下督撫。皆欲奔走其門。以為快。而先生澹然置之。五十四年夏。和相年四十。自宰相而下。皆有幣帛賀之。惟先生獨賦詩十首。並檢書畫銅甕數物。為公相壽。余又曰。公將以此詩入冰山錄中耶。先生默然。乃大悟。終其身不交和相。六十年二月。貴州苗民石柳鄧。湖南苗民石三保等。聚眾劫掠。人民震恐。先生聞之。即馳赴常德。籌辦滅賊之計。事既平。尚駐辰州。以積勞成疾。卒于當陽旅館。年六十七。後二年。和相果伏法。先生著作甚多。一時不能盡記。尤好法書名畫。嘗命余集刻經訓堂帖十二卷。海內風行。至今子孫尚食其利云。

夢樓太守

丹徒王夢樓太守。名文治。字禹卿。乾隆二十五年進士第三人。以翰林侍講出知臨安府。其未第時。嘗為侍讀全公魁幕客。冊封琉球。有海天遊草。太守既工書法。詩亦深純精粹。遠過時流。有夢樓詩集二十四卷。袁簡齋太史謂其細筋入骨。高唱凌雲。非虛語也。其書亦天然秀發。得松雪華亭用筆。至老年則全學張即之。未免流入輕挑一路。然較劉文清。梁侍講兩公。似有過之無不及耳。

竹嶼中舍

長洲吳竹嶼先生。名泰來。字企晉。為吳中七子之一。中乾隆庚辰進士。與秋帆尚書同年。二十七年。召試進內閣中書。先生意致蕭閒。才情明秀。作詩一本漁洋。著有硯山堂集十卷。五十二年。尚書為河南巡撫。延先生為大梁書院山長。余時亦在幕中。與洪稚存。方子雲。徐朗齋輩。飲酒賦詩。殆無虛日。未幾卒。

穆堂侍御

許穆堂先生。名寶善。青浦人。乾隆庚辰進士。歷官浙江道監察御史。丁艱歸。遂不出。常寓吳門。以詩文自娛。尤工於詞曲。善戲謔。舉座莫不傾倒。著南北宋填詞譜。吳中



諸樂部莫不宗仰之者。

### 蘇潭中丞

南康謝蘊山先生名啟昆。乾隆庚辰進士。通于史學。嘗補西魏書。以正魏收之陋。先生官浙江布政使時。余時在轉運使幕中。蒙先生垂盼。往來甚密。著有補史亭詩。浙東小草。蓬壺軒草諸刻。所交皆一時名士。如胡萊君。沈磐谷。皆在幕下。唱和甚多。後擢廣西巡撫。又著粵西金石記十二卷。卒于任。

### 耘松觀察

陽湖趙耘松觀察名翼。幼聰穎。年十二。學為文。一日成七藝。莫不異之。以直隸商籍入學。乾隆庚午。中順天舉人。辛巳成進士。以第三人及第。由編修出守廣西。民淳訟簡。人民悅服。適緬甸用兵。奉命赴滇。贊畫軍事。調廣州監司。未幾擢貴州貴西兵備道。而以廣州讞事鵠級。遂乞養歸田。十年。母既終。不復出。五十二年。臺灣林爽文作亂。李公侍堯奉命赴閩。過常時。邀先生為參贊。事既平。李公欲入奏起用。先生固辭之。遂由建寧分道。遊武彝九曲。過常玉山。遍歷浙東山水之勝。與當世賢士大夫相唱酬。以為樂。年八十八而卒。所著有廿二史劄記三十六卷。陔餘叢考四

十三卷。簷曝雜記六卷。皇朝武功紀略四卷。甌北詩抄。甌北詩話。甌北集。共若干卷。學者稱甌北先生。

### 鈞心學士

吳門褚鈞心先生。名廷璋。字左莪。為先外祖華嶢山先生受業弟子。始以明經教授。太和旋入為中書舍人。登癸未進士。入翰林。至侍讀學士。嘗奉 敕纂修西域圖志。暨西域同文志。於回部山川風土。最為熟悉。三典省試。四校禮闈。舟車所及。山水之勝。人物之奇。莫不發之於詩。王蘭泉司寇謂過於宋之范文穆公云。著有鈞心詩鈔十二卷。

### 秋室學士

仁和余秋室先生。名集。乾隆丙戌進士。官至翰林學士。先生為人。端雅修潔。工書畫。尤精于人物。歷典鄉會試。以病告歸。為大梁書院山長。既又為婁東書院山長。年八十餘。尚能作蠅頭小楷。沒於吳門。

### 杜鄉宮保

元和姜杜鄉宮保。名晟。字光宇。為前明給事中塚四世孫。家亦貧。忍饑勵學。中乾隆



丙戌進士。除刑部主事。歷官刑部尚書。湖廣直隸兩省總督。加太子少保。吳中科第。官刑部而洞悉刑名者。首推宮保與韓桂舫兩尚書云。宮保官湖南巡撫時。偶見余筆墨。遂大稱賞。屢囑屬吏馳書來聘。時余以母老辭。不赴也。前後二十年中。南北往來。雖未一面。而有知己之感云。

### 榕皋先生

吳縣潘榕皋先生名奕雋。字守愚。少聰穎。年十六。以商籍補仁和縣學生。中乾隆壬鄉榜。己丑成進士。及殿試。名列第七。以引見不到。降附三甲末造。御試保和殿。欽定第十名。以內閣中書用。補官十餘年。除戶部主事。遂拂衣歸。自此林居四十餘年。讀畫評詩。遊心物外。怡然樂也。道光壬午歲。重赴鹿鳴。己丑歲。又將重赴瓊林。時年已九十矣。以兩江總督大學士蔣公攸銛奏陳。奉旨加四品卿銜。著加恩免其進京。以示體恤耆儒之至意。是年適遇覃恩。胞姪世思以所得一品封典。貤封光祿大夫。先生生一子。名世璜。中己卯探花。亦授戶部主事。兩孫俱補博士弟子員。嘗賦紀恩詩十首。海內名公卿和者甚眾。莫不榮之所著有三松堂詩文集若干卷。行於世。泳自束髮。遊吳門。與先生為忘年交。往還最密。相知亦最深。鳴

呼若先生者可謂五福兼備者矣

## 二雲學士

邵二雲先生名晉涵餘姚人乾隆辛卯科會元五十七年余初入京師謁見先生于橫街寓第時官翰林侍講為人樸野德行恂恂今之召伯春也而經學之修明文章之通達賈鮮其匹是時蕭山王南陔中丞尚為秀才常在先生坐中遇之劇談古今每至竟日所著爾雅正義可補邢昺之陋略又有公羊傳孟子義疏諸書未傳于世

## 黼堂少宰

嘉善家黼堂少宰名樾中乾隆壬辰進士歷官至吏部左侍郎少工書法歷踐清華年七十餘自營生壙一切飾終之具皆自經理一日早起命家人將書籍筆硯字畫什物及生平玩好之具盡行點檢關鎖封固若將有遠行者遂坐後堂儼然而逝余見少宰為翰林時其貌絕似趙榮祿畫像過五十後兩耳下忽添長鬚至七十餘鬚髮俱白惟兩耳下鬚黑亦罕見者少宰歿後二十年其令子熙屬余刻神道碑立於墓左裴裒丙舍者三日而去時道光壬辰四月也

## 芝巖太史



吳縣范芝巖太史名來宗字翰尊為宋文正公後中乾隆乙未進士入翰林告歸時年五十餘矣范氏故有義莊積逋累累不能資族中咸推先生為主奉清釐整頓一秉至公不三十年增置良田一千八百餘畝市廛百餘所每歲可息萬金文正公墓故在河南洛陽縣之萬安山文正祖墓在蘇州之天平山俱煥然一新而子孫之窮困者例給錢米一切喪葬助恤考試之費俱倍加自此義莊又復振興皆先生力也年八十一卒著有治園詩藁十八卷

### 魚山比部

馮魚山先生名敏昌廣東欽州人中乾隆戊戌進士入翰林改戶部主事丁外艱回籍為南海書院山長卒于羊城先生之學經經緯史而詩歌古文金石書畫亦靡不貫綜欽州在中華極南地接連交趾有明至今從無科第得之自先生始也京師士大夫咸稱為南方之學云

### 杜邨觀察

吳杜邨先生名紹浣安徽歙縣人世以鹽筴為業寓揚州已百餘年家道殷富乾隆乙未戊戌兩科先生與其兄紹燦同中進士入翰林先生精于賞鑒所藏法書名畫

甚多。當時如彭南昌、董富陽、王韓城、劉長沙諸相國，所貢圖籍書畫，必經先生品題而後奏進。家有顏魯公竹山聯句、徐季海、朱巨川告懷素小草千文、王摩詰輞川圖、貫休十八應真象，皆世間希有之寶。至宋元明人其次焉者也。嘉慶初年，余每到邗上，輒主其家。而先生喜余之至，亦必掃榻以待之。後家事中落，不得已報捐觀察，補河南南汝光道，卒於官。

### 秋史侍御

揚州江秋史侍御，前安慶太守恂子。中乾隆庚子，恩科進士第二人，博雅能詩，尤嗜古碑帖。自周秦兩漢、魏晉六朝、唐宋元明金石文字，搜羅殆遍。余于乾隆壬子年，在京師始識之。時秋史丁太守公艱，賦閒無事，時相過從，語必終日，不知誰為賓主也。忽以青田石一塊，高二三寸許，琢為漢碑式，極古雅。上刻云：君諱德量，字量殊，江都人。太守君之元子也。舉進士官御史，世精古文。金石竹素靡不甄綜。乃于乾隆五十七年霜月之靈利，茲嘉石以傳億載。其明年將服闋，卒于京師，咸以為碑識云。

### 平階中丞

清平階中丞，名安泰，滿州鑲黃旗人。中乾隆辛丑進士，為人謙雅，能詩歌，清新有法。



喜隸書亦蒼勁入古而政事修明雖猾吏莫能惕其竈也中丞歿後公子尚幼其青衣李某為刻其詩菊溪相國序之

### 淵如觀察

孫淵如觀察名星衍陽湖人父勳舉人為山西河曲令觀察生之夕祖母許夢星墮于懷因以名之幼聰穎年十餘齡能背誦昭明文選不遺一字比長肄業金陵鍾山書院袁簡齋太史屢稱之曰天下清才多奇才少今淵如乃天下奇才也一時名士如楊西禾洪稚存顧立方錢獻之汪容甫趙味辛呂叔訥楊蓉裳黃仲則何南園方子雲儲玉琴汪劍潭輩皆為傾倒觀察尤好山水之遊金石之學錯綜經義泛覽百家以及釋道諸書莫不賅貫原始要終先達中如王西莊朱竹君錢辛楣王蘭泉姚姬傳趙雲松諸先生亦莫不賞異之也乾隆五十一年始舉於鄉明年成進士對策稱旨以第二人及第授編修充三通館校理散館以刑部主事用旋陞員外除郎中總辦秋審處每有疑獄平反核讞全活甚多出為山東兗沂曹濟道權臬使治行廉平活死罪誣服者十餘輩亦不以之罪縣官曰縣官實不盡明刑律皆僚幕誤之也是以山左吏治為之一變丁母艱後不復出買屋金陵築五松園將為終老計當